

Un tarea cu tambe ta regarda henter comunidad:

# Cambionan den K.P.A. ta pa bolbe na e Cuerpo Policial respeta di antes

ORANJESTAD (AAN) — Diabierna ultimo tabata tin un ceremonia di Cuerpo Policial, cu a tuma lugar na Warda di Polis di Noord, unda un grupo di polis cu a gradua a huramenta, y dos grupo mas, un cu a ricibi certificado di opleiding basico y otro cu a haya diploma MBO.

Tabata presente Alto Comisario mr. Ronny Bernadina, Comisarianan, Comandante di Bombero, representante di Douane, miembronan di Cuerpo Special Arubiano (CEA), SPA, representante di Departamento di Enseñanza, tur e graduadonan y nan respectivo famia, demas invitadonan y prensa.

Den number di gobierno esnan cu a huramenta y esnan cu a haya certificado y diploma, a ricibi palabranan di felicitacion y pa nan famianan un danki pasobra nan a fia gobierno e personanan aki pa haci un trabao unico den comunidad. Gobierno ta sumamente orguyoso cu e trabaonan cu a keda haci, manera e edificionan nobo pa polis, pero nan ta sinti cu falta algo, y esaki a pone e orado corda riba ex-polis sr. Ambricio Winterdaal (den feliz memoria) cu a expresa cierto palabranan, y cu ta coincide cu e pensamento di otro persona cu tambe a haci un gran trabao den KPA, esta Shon Pe Krozendijk.

Locual sr. Winterdaal a yega di expresa ta su temor cu ora e hobennan cu caba di bira polis subi caya seis luna largo, ora nan bolbe paden nan no ta mesun disciplina cu e momento cu nan a laga school pa subi caya.

Esaki ta motibo di preocupacion pasobra e ta refleha cu "algo tin eyfo cu no ta bon", pasobra di con si e polisnan a sali cu disciplina, despues di seis luna di sirbi comunidad riba caya, nan ta perde e disciplina ey? Pakico despues cu nan a bay traha cu e otro coleganan, ora nan bolbe nan a perde e disciplina?

Segun e orado KPA tin un tarea, pasobra antes ora cualkier ciudadano tabata wak un polis para su dilanti, e tabata expresa asombro di wak un funcionario publico cu tabata inspira respet pafo pa tur hende, y e tabata manda un señal di disciplina

cu e ciudadanonan mester a respeta tambe. Pero e asombro ey cerca comunidad, lamentablemente a bay perdi.

Pa tal motibo ta bin cambionan unda cu no solamente e mayornan di e aspirantenan, of esnan cu ta bay traha riba caya, of esnan cu a haya diploma ayera, of esnan cu tin mas aña como polis, ni ta un tarea solamente di sindicato di polis pero di henter KPA y pueblo conhuntamente, pa bay atrobe na e Cuerpo Policial respeta di antes, y pa atrobe unda polis yega, manda un señal di respet y disciplina.

Segun gobierno polis no mester tuma esaki como un critica, pero pa nan ta constructivo y percura pa e falta di disciplina di cual Shon Pe Krozendijk a papia, keda coregi y KPA ta na tempo pa haci esaki.

Gobierno ta convenci cu Aruba ta conta cu un bon producto caba y a pesar di tur e situacion cu a surgi cu e caso di Natalee Holloway cu ni un di nos sa unda e ta, nos pais tog tin cu percura pa manda e mensahe pafo cu nos isla ta, en todo caso, e pais mas sigur den henter

area di Caribe.

Pasobra e cifranan ta demostra cu na Aruba e cifranan di criminalidad, den termino general a baha, aunke tin algun aspecto preocupante manera hortamento y desmantelacion di auto.

## VOORRAAD POLITIE OP!!

